



**P R I M E
M I N I S T E R**

**DEKLARASAUN IMPRENSA HUSI SUA EXELÉNSIA
KAY RALA XANANA GUSMÃO, PRIMEIRU MINISTRU REPÚBLIKA
DEMOCRÁTICA TIMOR-LESTE
HAFOIN REUNIAUN BILATERAL HO EXMO. ANTHONY ALBANESE, MEMBRU
PARLAMENTU NO PRIMEIRU MINISTRU AUSTRALIA NIAN,**

Dili, Ioron 28 fulan-janeiru tinan 2026



Palácio do Governo,
Avenida Presidente Nicolau Lobato,
Dili, Timor-Leste

Ho onra boot ha'u simu Primeiru-Ministru Anthony Albanese mai Timor-Leste iha vizita ofisiál ida-ne'e.

Primeiru-Ministru Albanese nia vizita nu'udar momentu importante ida iha relasoins entre ita-nia nasaun rua no reflete profundidade amizade, konfiansa no parseria entre Timor-Leste no Austrália.

Ami-nia diskusaun sira ohin nian la'o ho amigavel, nakloke no produtivu. Ami konkorda atu estabelese parseria foun ida ba era foun ida ne'ebé reflete maturidade hosi ita-nia relasaun no ita-nia futuru hamutuk.

Ita-nia relasaun forma hosi solidariedade iha tempu konflitu no hosi parseria iha tempu pás nian.

Ohin, ami reafirma ami-nia kompromisu hamutuk ba rejiaun ida ne'ebé pasífiku no prósperu.

Austrália sai nu'udar defensor ida ne'ebé forte ba Timor-Leste nia adezaun ba ASEAN no ha'u agradese ba Primeiru-Ministru ba apoiu ne'e.

Ami reafirma importánsia direitu internasionál nian, inklui Konvensaun Nasoins Unidas kona-ba Direitu Marítimu.

Ita-nia Tratadu Fronteiras Marítimas 2018 sai nafatin ezemplu boot ida kona-ba oinsá disputa sira bele rezolve ho dame no justu liuhosi diálogo no lei.

Ami-nia konversa sira ohin foka mós ba promosaun dezvoltimentu no kriaun empregu sira, no mós parseria kontinua Austrália nian hodi apoia prioridade sira-ne'e.

Ami reafirma ami-nia kompromisu hamutuk ba dezvoltimentu *Greater Sunrise*.

Timor-Leste nia pozisaun kona-ba *Greater Sunrise* sempre klaru - gás natural husi Greater Sunrise tenke prosesa iha rai-maran, iha Timor-Leste.

Ida-ne'e esensial ba ita-nia dezvoltimentu nasional no ba ita-nia nasaun nia forsa ba tempu naruk. Dezvoltimentu *Greater Sunrise* sei fó kampu servisu no oportunidade ba joven timoroan sira hodi hetan abilidade no partisipa iha indústria emergente sira.



Palácio do Governo,
Avenida Presidente Nicolau Lobato,
Dili, Timor-Leste

Ha'u subliña ba Primeiru-Ministru Austrália katak Timor-Leste iha kompromisu atu kontinua projetu *Greater Sunrise* iha maneira ne'ebé komersiálmente viavel, téknikamente sólida no tuir ita-nia povu nia interese.

Ami haksolok tebes tanba ohin ami konkorda atu aselera ami-nia negosiasaun hodi finaliza Kódigu Minerasaun Petrolífera, Kontratu Fahe Produsaun no rejime fiskál ho lalais.

Ami mós diskute kona-ba Austrália nia programa mobilidade laborál ne'ebé kontinua fó benefísiu réal ba traballadór timoroan sira no sira-nia família.

Ami konkorda atu servisu hamutuk hodi hasa'e númeru timoroan sira ne'ebé bele servisu iha Austrália.

Ligasaun entre povu sira nafatin sai sentru iha ita-nia relasaun.

Ema australianu sira, hanesan Primeiru Ministru Albanese, ne'ebé mak apoia makas ita-nia luta ba independénsia.

Ami reafirma ami-nia kompromisu atu hametin ligasaun sira entre ami-nia povu sira, inklui sociedade sivil, igreja no grupu amizade sira, grupu eskola sira no veteranus.

Ohin mós ha'u fó-sai katak Timor-Leste identifika ona rai ida iha Dili, besik ita-nia Ministériu Negósius Estranjeirus no Kooperasaun, ne'ebé ita sei fó ba Austrália ba konstrusaun Embaixada foun ida.

Konsesaun rai ida-ne'e permite ita atu selu favór ne'ebé Australia fornese ona rai ba Timor-Leste, ne'ebé permite ona ita atu harii ita-nia Embaixada iha Canberra.

Ami kontente tanba Austrália planeia atu harii Embaixada foun no boot liu, ne'ebé reflete ninia kompromisu forte no longu prazu ba Timor-Leste.

Iha tempu mudansa no inserteza globál, Timor-Leste valoriza tebes ita-nia parseria ho Austrália.

Ita fahe vizaun ida ba mundu ida ne'ebé pasífiku, iha ne'ebé dezvoltimentu ne'e inkluzivu, iha ne'ebé direitu internasionál fó baze atu prevene konfliktu no iha ne'ebé direitus umanus hetan respeitu.

Ha'u agradese ba Primeiru-Ministru Albanese ba nia vizita, ba Austrália nia amizade no ba progresu ne'ebé ita alkansa ohin hodi servisu hamutuk ba ita-nia povu nia di'ak.

Ha'u agora konvida Primeiru-Ministru Albanese atu ko'alia liafuan balun.